

## **REGULAMENTO DE RÉXIME INTERNO DO INSTITUTO UNIVERSITARIO DE ESTUDIOS EUROPEOS “SALVADOR DE MADARIAGA”**

Os artigos 14 a 17 dos Estatutos da Universidade da Coruña (UDC), aprobados por Decreto 101/2004, de 13 de maio, adócanse a regular os Institutos Universitarios de Investigación en canto ao seu concepto, funcións e clasificación. En concreto, o artigo 14 dos Estatutos conceptúa os Institutos universitarios de investigación como “centros adicados á investigación científica e técnica ou á creación artística e á docencia especializada, de posgrao e de doutoramento”. E no artigo 47 dos Estatutos aparece recollida a figura dos/das directores/as dos Institutos Universitarios de Investigación.

Pola súa banda, o artigo 2 do Regulamento de creación, modificación e supresión dos Institutos universitarios de investigación da UDC, aprobado por acordo do Consello de Goberno de 20 de xullo de 2006, sinala que os Institutos rexeranse polo establecido na Lei Orgánica 6/2001, de 21 de decembro, de Universidades, pola lexislación do Estado e da Comunidade Autónoma de Galicia na materia, polos Estatutos da UDC, polo convenio de creación ou adscrición, no seu caso, polos acordos do Consello de Goberno e polo seu regulamento de réxime interno. En dito Regulamento inclúense normas sobre os membros do Instituto e sobre os órganos de goberno e dirección, detallándose a forma de elección e as competencias dos mesmos, respectando o establecido nos Estatutos da UDC.

A regulación do réxime de funcionamento e organización do Instituto Universitario de Estudios Europeos (IUEE) “Salvador de Madariaga” fica enmarcada, deste xeito, na normativa estatal e autonómica aplicable á Universidade da Coruña, en concreto: na Lei Orgánica 6/2001 de Universidades (BOE de 24 de decembro), modificada pola Lei Orgánica 4/2007 (BOE de 13 de abril), e no Decreto 101/2004 que aproba os Estatutos da Universidade da Coruña (DOG de 26 de maio), así como na Lei 30/1992 de Réxime xurídico das administracións públicas e do procedemento administrativo común (BOE de 27 de novembro), modificada pola Lei 4/1999 (BOE 14 de xaneiro), naqueles aspectos que se recollen na presente normativa e que son de obrigado cumprimento ou que con carácter subsidiario foren de aplicación. Tamén resultan de aplicación os acordos do Consello de Goberno da UDC na materia, e o Decreto 243/1997 polo que se crea o IUEE (DOG de 12 de setembro).

### **TÍTULO PRELIMINAR DO ÁMBITO E DO RÉXIME XURÍDICO DE APLICACIÓN**

#### **Artigo 1. Obxecto do regulamento**

O presente regulamento establece e regula o funcionamento e organización do Instituto Universitario de Estudios Europeos (IUEE) “Salvador de Madariaga” da Universidade da Coruña (UDC).

## **Artigo 2. Ámbito de aplicación do regulamento**

O presente regulamento será de aplicación ao IUEE e, consecuentemente, será de obrigado cumprimento para todos os seus compoñentes en canto membros del.

## **Artigo 3. Réxime xurídico do IUEE**

1. O IUEE rexeráse pola Lei Orgánica de Universidades, polas normas que emanen dos correspondentes órganos do Estado e da Comunidade Autónoma de Galicia no exercicio das súas respectivas competencias, polos Estatutos da UDC e as súas normas de desenvolvemento, polo Decreto 243/1997 que crea o IUEE e, finalmente, polo presente Regulamento de réxime interno.
2. En defecto do establecido no presente Regulamento aplicarase a Lei 30/1992 de réxime xurídico das administracións públicas e do procedemento administrativo común.
3. Contra as resolucións e acordos dos órganos unipersoais ou colexiados do Instituto poderá formularse recurso de alzada no prazo dun mes perante o/a reitor/a, tratándose de resolucións do/a director/a, ou perante o consello de goberno, tratándose de acordos do Consello do Instituto, cuxa decisión esgotará a vía administrativa e será impugnabile perante a xurisdición contencioso-administrativa de conformidade coa lei reguladora desta xurisdición.

## **TÍTULO I**

### **NATUREZA, FINS E FUNCIÓNS DO IUEE “SALVADOR DE MADARIAGA”**

## **Artigo 4. Natureza e clase do IUEE**

1. O IUEE é un centro adicado á investigación científica e técnica e á docencia especializada, de posgrao e de doutoramento, sobre aspectos da realidade internacional e europea e, en particular, os relativos á Unión Europea.
2. O IUEE é un Instituto propio creado polo Decreto 243/1997.

## **Artigo 5. Funcións do IUEE**

Son funcións do IUEE as seguintes:

- a) A planificación e execución de programas de investigación básica ou aplicada.
- b) A organización e o desenvolvemento de cursos especializados e de doutoramento.
- c) O asesoramento científico e/ou técnico no ámbito da súa competencia.

- d) A promoción e realización de contratos con persoas físicas, entidades públicas ou privadas, nacionais ou estranxeiras, de acordo coa lexislación vixente e cos Estatutos da UDC.
- e) Calquera outra función que as leis e os Estatutos lle atribúan.

## **TÍTULO II**

### **DA ORGANIZACIÓN DO IUEE “SALVADOR DE MADARIAGA”**

#### **CAPÍTULO I**

##### **DA ESTRUCTURA DO IUEE “SALVADOR DE MADARIAGA”**

#### **Artigo 6. Membros do IUEE.**

1. Poden ser membros IUEE:
  - a) Persoal docente e/ ou investigador da UDC que se adscriba ao IUEE. Esta adscrición será por dous anos, renovándose tacitamente, agás renuncia da persoa interesada ou informe negativo do Consello do IUEE
  - b) Persoal investigador con cargo a convocatorias públicas nacionais ou autonómicas publicadas nos diarios oficiais, así como bolseiros e contratados de investigación da UDC.
  - c) Persoal de Administración e Servizos, que poderá ser do cadro de persoal da UDC ou contratado para programas específicos de investigación.
2. Ningún membro dos sinalados no apartado anterior poderá pertencer a máis dun Instituto Universitario aos efectos do establecido nas Seccións Segunda e Terceira deste Título III do Regulamento de creación, modificación e supresión dos Institutos universitarios de investigación da UDC, debendo optar, sempre a tales efectos, por aquel Instituto co que teña maior actividade ou afinidade
3. O número de membros non poderá ser inferior a doce doutores pertencentes ás categorías de catedráticos de universidade, profesores titulares de universidade, catedráticos de escola universitaria, profesores titulares de escola universitaria ou profesores contratados doutores, con dedicación a tempo completo.
4. O IUEE poderá contar con membros honorarios nomeados entre aquelas personalidades de recoñecido prestixio alleas á UDC que se destacaran polas súas investigacións nas materias encadradas no ámbito de actuación do IUEE. Estes membros honorarios serán nomeados polo reitor por proposta do Consello do IUEE. Non contarán para o número mínimo de membros establecido no número 3 deste artigo e non serán membros do Consello do IUEE.

## **Artigo 7. Adscrición de membros ao IUEE**

A adscrición de membros ao IUEE realizarase consonte o disposto no Regulamento de creación, modificación e supresión de Institutos universitarios de investigación da Universidade da Coruña.

## **Artigo 8. Grupos de investigación.**

O IUEE fomentará a constitución de grupos e redes de investigación en que participen os seus investigadores.

## **CAPÍTULO II DO GOBERNO DO IUEE “SALVADOR DE MADARIAGA”**

### **Artigo 9. Órganos de goberno do IUEE**

Para o goberno, representación e administración do IUEE establécense os seguintes órganos:

- a) Colexiados:
  - Consello do IUEE
- b) Unipersoais:
  - Director/a do IUEE
  - Secretario/a do IUEE

## **SECCIÓN PRIMEIRA DO CONSELLO DO IUEE “SALVADOR DE MADARIAGA”**

### **Artigo 10. Composición e competencias do Consello**

A composición e as competencias do Consello do IUEE, así como a elección dos representantes dos sectores de membros non natos, son os recollidos no Regulamento de creación, modificación e supresión de Institutos universitarios de investigación.

### **Artigo 11. Funcionamento do Consello**

1. O Consello do IUEE reunirse en sesión ordinaria cantas veces sexa necesario e, polo menos, dúas veces ao ano, e en sesión extraordinaria sempre que o/a director/a o convoque por propia iniciativa ou por solicitude de dous terzos dos seus membros, en cuxo caso se realizará nos quince días seguintes ao de recepción da solicitude.
2. A orde do día das sesións será fixada polo/a director/a tendo en conta, se for o caso, que calquera dos membros do Consello do IUEE poderá solicitar a inclusión dun punto na orde do día. En tal caso, este punto incluírase na primeira sesión que se convoque, sempre que se solicitase coa suficiente antelación.

3. A convocatoria será efectuada polo/a secretario/a do Instituto por orde do director/a ou de quen legalmente o/a substitúa. Esta convocatoria incluírá a data, hora e lugar de celebración da sesión, así como a orde do día. As citacións da convocatoria cursaraas o/a secretario/a coa antelación suficiente para que todos os membros a reciban corenta e oito horas antes da celebración da sesión, incluíndo unha orde do día explícita, sen referencias xenéricas.

As citacións levaranse a cabo mediante notificación persoal por carta ao centro de traballo ou notificación en soporte informático con garantías da súa recepción.

4. Cando a natureza dos asuntos que se foren tratar así o requira, a xuízo do/a director/a, poderanse convocar ás sesións do Pleno ás persoas que se estime necesario, con voz mais sen voto.
5. As sesións extraordinarias do Consello do IUEE están sometidas aos mesmos requirimentos que as ordinarias, coa excepción de que a súa convocatoria pode facerse con só vinte e catro horas de antelación e para o tratamento de puntos de inaprazable consideración. Non se incluírán na orde do día os puntos relativos á aprobación de actas, informes ou suxestións e preguntas.

## **Artigo 12. Constitución do Consello**

Para a válida constitución do Consello do IUEE, para efectos da realización das sesións, deliberacións e toma de acordos, requirirase a presenza do/a director/a e secretario/a ou, se for o caso, de quen os/as substitúa e da metade, polo menos, dos seus membros, sen contar os membros honorarios.

De non acadarse este quórum, e de conformidade co disposto no art. 26.2 da lei 30/1992 de réxime xurídico das administracións públicas e do procedemento administrativo común, modificada pola lei 4/1999, o Consello do IUEE poderá constituírse en segunda convocatoria coa presenza dos membros asistentes e, en todo caso, a do/a director/a e do/a secretario/a ou, se for o caso, de quen o substitúa.

## **Artigo 13. Asistencia e desenvolvemento das sesións do Consello**

1. A asistencia ás sesións do Consello é un dereito e un deber dos membros que o integran.
2. A condición de membro do Consello é persoal e non delegable.
3. Calquera ausencia poderase xustificar por escrito con anterioridade á sesión en que se produza perante o/a secretario/a.
4. Ás sesións do Consello só poderán asistir os seus respectivos membros, agás no caso recollido no artigo 11, apartado 4.
5. Non poderá ser obxecto de deliberación ou acordo ningún asunto que non figure incluído na orde do día, agás que estean presentes todos os membros do órgano colexiado, sen contar os honorarios, e sexa declarada a urxencia do asunto polo voto favorable da maioría.

#### **Artigo 14. Votacións e adopción de acordos do Consello**

1. As votacións poderanse realizar por asentimento por proposta do/a director/a, a man alzada, pública por chamamento, ou secreta. O/a director/a decidirá a utilización dunha ou doutra modalidade. Porén, a votación secreta poderá ser utilizada cando o acordo que se deba adoptar tiver carácter persoal. Considéranse adoptados os acordos por asentimento cando as propostas sometidas ao Consello non suscitaren oposición de ningún membro desta e non requirise outra forma de votación ningún membro.
2. O Consello adoptará os seus acordos por maioría de votos afirmativos fronte aos negativos, sen ter en conta as abstencións, agás naqueles supostos en que se esixa, legal ou regulamentarmente, maioría absoluta ou cualificada.
3. En caso de empate nos resultados dunha votación, o/a director/a decidirá co seu voto de calidade.
4. Non poderán someterse a votación aquelas cuestións que non estiveren especificadas en cada punto da orde do día e en relación directa con elas. Tampouco poderán tomarse acordos dentro dos apartados da orde do día correspondentes a “Informes” e “Suxestións e Preguntas” ou similares.
5. Iniciada unha votación, esta non poderá interromperse.

#### **Artigo 15. Actas do Consello**

1. De cada sesión que teña lugar do Consello redactará a acta o/a secretario/a, que especificará necesariamente a relación de asistentes e ausentes que achegasen a xustificación, a orde do día da reunión, as circunstancias do lugar e tempo en que tivo lugar, os puntos principais das deliberacións, así como o contido dos acordos e o xeito en que estes se adoptaron.
2. Na acta figurará, após solicitude dos respectivos membros do Consello, o voto contrario ao acordo adoptado, a súa abstención e os motivos que a xustifiquen ou o sentido do seu voto favorable. Así mesmo, calquera membro ten dereito a solicitar a transcripción íntegra da súa intervención ou proposta, sempre que achegue no acto ou no prazo que sinala o/a director/a o texto que se corresponda fielmente coa súa intervención, facéndose así constar na acta ou uníndose copia a ela.
3. Os membros que discrepen do acordo maioritario poderán formular voto particular por escrito no prazo de corenta e oito horas, que se incorporará ao texto aprobado.
4. Cando os membros do órgano votaren en contra ou se abstiveren, quedarán exentos da responsabilidade que, se for o caso, puidese derivarse dos acordos.
5. As actas aprobaranse na mesma ou na seguinte sesión, podendo non obstante emitir o/a secretario/a certificación sobre os acordos específicos que se adoptasen, sen prexuízo da ulterior aprobación da acta.

## **Artigo 16. Comisión permanente do Consello**

1. Créase unha Comisión Permanente, con competencias limitadas á resolución de asuntos urxentes de trámite, podendo o Consello delegarlle puntualmente algunha das súas competencias propias. Os acordos que adopte a Comisión Permanente relativos a competencias delegadas polo Consello do IUEE serán comunicadas a éste na primeira sesión ordinaria que se realice.
2. A composición da Comisión Permanente será a seguinte:
  - a) Director/a do IUEE
  - b) Secretario/a do IUEE
  - c) Unha terceira persoa designada polo Consello.
3. No seu funcionamento rexeranse polas mesmas normas recollidas nos artigos 10 a 15 do presente regulamento.

## **Artigo 17. Comisións do Consello**

1. O Consello, para efectos do seu mellor funcionamento ou actuación, poderá constituír comisións con carácter de apoio ou asesoramento que non terán capacidade decisoria, e que deberá remitir todas as propostas que se adoptaren ao Consello ou ao/á director/a, se for o caso, que decidirán en última instancia.
2. As comisións estarán compostas polos membros do Consello designados polo mesmo. A súa renovación levarase a cabo seguindo os criterios que estableza o propio Consello.
3. As funcións que correspondan a cada comisión asignarallas o Consello.
4. Para o seu funcionamento e adopción de acordos rexeranse polas normas establecidas para o Consello no presente regulamento.

## *SECCIÓN SEGUNDA DOS ÓRGANOS UNIPERSOAIS*

### **Artigo 18. Do/a director/a do IUEE**

1. O procedemento de elección e as competencias do/a director/a do IUEE rexeranse polo establecido na normativa aplicable ao efecto.
2. En caso de vacante, ausencia ou enfermidade, o/a director/a será substituído/a pola persoa expresamente designada por aquel/a.

### **Artigo 19. Do/a secretario/a do IUEE**

1. O/a secretario/a é o/a fedatario/a dos actos e acordos dos órganos de goberno e administración do-IUEE. A súas funcións son as recollidas no Regulamento de creación, modificación e supresión de Institutos universitarios de investigación.

2. O/a secretario/a será nomeado/a polo/a reitor/a, por proposta do/a director/a do IUEE, entre o persoal docente e/ ou investigador da Universidade da Coruña que se adscriba ao IUEE.
3. O/a secretario/a cesará no seu cargo por pedimento propio, por causa legal sobrevida ou por decisión do/a reitor/a, por proposta do/a director/a do IUEE.

## **TÍTULO V DO RÉXIME ECONÓMICO**

### **Artigo 20. Recursos económicos do IUEE**

1. Para a realización da organización do ensino e dos procesos académicos, administrativos e de xestión, e para a investigación, o IUEE dispón:
  - a) Dos bens, equipos e instalacións que, previamente inventariados, a UDC lle destine.
  - b) Dos recursos que nos orzamentos da UDC se lle asignen.
  - c) Das aportacións das entidades públicas e privadas coas que asinen proxectos, contratos e/ ou convenios.

A UDC aportará as cantidades que correspondan pola produción científica dos membros que así o soliciten, así como un mínimo para gastos de representación, material inventariable e material funxible.

2. Corresponde aos órganos de goberno do IUEE velar polo mantemento e renovación dos recursos adscritos a ela. Da súa conservación directa son responsables todos os membros adscritos ao Instituto, e esta será supervisada polo/a director/a do IUEE.

### **Artigo 21. Competencias en materia económica**

1. O Consello do IUEE adoptará anualmente os criterios para a asignación dos recursos do IUEE que serán destinados ao funcionamento deste e á atención das tarefas docentes e/ou investigadoras dos membros que o integran.
2. Correspóndelle á dirección do IUEE:
  - a) Elaborar o proxecto de orzamento e autorizar os gastos dentro das previsións do mesmo.
  - b) Elaborar e presentar anualmente ao Consello, para o seu debate e, se for o caso, aprobación, unha estimación dos ingresos e gastos do no seu conxunto co reparto máis pormenorizado posible dos capítulos e unidades de gasto previstos para o exercicio económico seguinte.



- c) Elaborar e presentar anualmente ao Consello, para o seu debate e, se for o caso, aprobación, unha conta xeral dos ingresos e gastos do Instituto no seu conxunto, distinguindo capítulos, conceptos e, no que sexa posible, unidades de gasto unha vez rematado cada exercicio económico.
3. Correspóndelle ao Consello do IUEE:
- a) Coñecer e, de ser o caso, aprobar a proposta do orzamento anual do IUEE.
  - b) Coñecer e, se for o caso, aprobar, as estimacións dos ingresos e gastos e a conta xeral de ingresos e gastos ás que se refiren os puntos b) e c) do apartado anterior.

## **TÍTULO V DA REFORMA DO REGULAMENTO**

### **Artigo 22. Iniciativa de reforma do regulamento**

Poderán propor a reforma do presente regulamento un tercio dos membros do Consello do IUEE, sen contar os honorarios. A proposta de modificación presentarase mediante escrito motivado dirixido ao/á director/a, indicando concretamente o que se quere reformar cunha redacción alternativa.

### **Artigo 23. Tramitación da reforma do regulamento**

O texto da proposta de reforma será enviado polo/a director/a aos membros do Consello, que disporán de quince días para presentaren emendas. Transcorrido este prazo convocarase sesión ordinaria do Consello para aprobar ou rexeitar a reforma proposta. Á convocatoria axuntaranse as emendas presentadas, que serán sometidas a debate e votación.

### **Artigo 24. Aprobación da proposta de modificación do regulamento**

Para a modificación do regulamento requirirase a súa aprobación por maioría absoluta do total dos membros do consello, sen contar os honorarios, e a súa posterior aprobación polo Consello de Goberno da UDC, após da remisión a este do texto aprobado polo Consello do IUEE.

### **DISPOSICIÓN FINAL ÚNICA. Entrada en vigor**

O presente regulamento entrará en vigor o mesmo día en que o aprobe o Consello de Goberno da UDC.